

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 11. Januar 2021

Här President,

sou wéi d'Chambersreglement et virgesäit, bieden ech lech, dës parlamentaresch Fro un den Här Bauseminister weiderzeleeden.

A leschter Zäit ass opgefall, datt d'Volleksrepublik China hir politesch Interessie méi offensiv vertritt. Zu Hong Kong koum et zu Ännerungen am legislativen Ëmfeld, besonnesch duerch e neit „Nationaalt Sécherheetsgesetz“, wat de Statutt vun Hong Kong an déi international Verflchtunge vun der Volleksrepublik China verletzt. Vill Mënsche goufe verhaft. D'Europäesch Unioun huet dorop de 7. Januar 2021 mat enger Erklärung vum Héije Verrieder fir Bausepolitik reagiert:

*"(...) The EU urges the authorities to respect Hong Kong's rule of law, human rights, democratic principles and high degree of autonomy under the 'One Country, Two Systems' principle, as enshrined in the Hong Kong Basic Law and in line with domestic and international obligations."*

Mee och géintwuer Taiwan trëtt China méi aggressiv op. Op d'mannst sechs mol sinn am Dezember 2020 Militärfliager aus der Volleksrepublik China an de Loftraum no un der Insel Taiwan geflunn, méi präzis si se an déi taiwanesch ADIZ (Air Defense Identification Zone) agedrongen. D'Zuel vun de Fligere, déi un esou intrusiven Operatioune bedeelegt sinn, ass am Laf vum Joer 2020 progressiv geklommen an hir Taktik ass iwwerdeems méi offensiv ginn. Déi neisten Tëscheffäll si bei méi grouse Militärmanöver vun der Volleksrepublik China an der Formosastrooss an am Südweste vun Taiwan geschitt. Déi informell sougenannte „median Linn“ an der Formosastrooss, déi bis elo fir eng gewëssen Espacéierung vun den Truppen an domat fir Rou an där Region gesuergt huet, gëtt zënter 2020 net méi vun der Volleksrepublik China respektéiert. Si bezeechent se elo als „net existent“.

An den Zesammenhank wollt ech der Regierung dës Fro stellen:

1. Ass d'Regierung der Meenung, datt no deene rezenten Entwécklungen zu Hong Kong, déi Doktrinn „E Land – zwee Systemer“ nach kann als realistesch agestuuft ginn? Wann nee, wéi eng Konsequenze fir d'Approche zu China géingen sech aus där Analys erginn?
2. China gëtt vu ville Staaten als eng ëmmer méi grouss militäresch Menace fir de ganze südost-asiatesche Raum gesinn, wat sech z.B. och an de strategesche Prioritéiten a Planunge vun den USA, Australien, Indien a Japan erëmispigelt. Deelt déi Lëtzebuerger Regierung déi Aschätzung? Wéi gesäit déi Lëtzebuerger Regierung déi laangfristeg

- Entwécklung vun der sécherheetspolitescher Stabilitéit an der geographescher Noperschaft vun der Volleksrepublik China?
3. Wëll d'Lëtzebuerger Regierung, sief et bilateral, sief et iwwer d'EU, géintiwwer Peking intervenéieren, fir kloer ze maachen, datt Lëtzebuerg, respektiv d'EU, keng Eskalatioun an de Relatiounen tëschent der Volleksrepublik China an Taiwan akzeptéiert?
  4. Wëll d'Lëtzebuerger Regierung, sief et bilateral, sief et iwwer d'EU, déi chinesesch Regierung dozou opruffen, keng Militäraktiounen méi an der Formosaastrooss ze lancéieren, déi kéinten als offensiv interpretéiert ginn?
  5. Wëll sech d'Regierung an hirem Dialog mat Peking, sief et bilateral, sief et iwwer d'EU, dofir asetzen, datt tëschent Peking an Taipeh e „substantiellen Dialog“ geféiert gëtt, esou wéi en vun der taiwanescher Presidentin proposéiert gëtt?
  6. Wäre et net un der Zäit, och als Zeeche géintiwwer Peking, niewent deenen ekonomeschen a kulturelle Bezéiungen och déi politesch Relatiounen mat Taiwan weider auszubauen, quitt datt si sech nach am Kontext vun der „Ee China“-Doktrinn beweegen?
  7. Wat ënnerhëlt d'Regierung konkret fir d'Participatioun vun Taiwan an internationale Foren ze begënschtgen, wéi z.B. och an der WHO oder der WTO?
  8. An deene leschte Joren ass eng impressionant Zuel u chinesesche Spionageaktivitéiten bekannt ginn, inklusiv an eisen Nopeschlänner. Konkret Problemer stellen sech z.B. och am Beräich vun de Kommunikatiounstechnologien. Dobäi ass net nëmme 5G am Gespréich, mee och Hackerugrëff. Wéi stellt sech Lëtzebuerg op déi chinesesch Spionage am Westen an? Wéi eng Sécherheetsmoossname ginn am Beräich vun de Kommunikatiounstechnologie a vun der Ofsécherung géint Hackerugrëff getraff? Ginn d'Sécherheetsdénkschter esou ausgeriicht, datt si och op spezifesch chinesesch Menace kënnen adequat reagéieren?
  9. D'Relatiounen mat Russland sinn e wichtege strategesche Facteur fir de Westen, besonnesch och am Kontext vun de Relatiounen mat China. Déi westlech Russlandpolitik huet mat dozou bäigedroen, datt Russland an deene leschte Joren seng Relatiounen mat China verdéift huet. Wäre et net un der Zäit, och aus strategeschen Iwwerleeungen eraus, d'Verhältnis zu Russland nei ze iwwerdenken?
  10. Sollt de Westen net un enger neier Afrika-Strategie schaffen, déi där chinesescher Strategie pro-aktiv entgéint trëtt, déi sech jo op d'Acquisitioun vu strategesche Gidder an Infrastrukture konzentréiert?
  11. Missten net och déi chinesesch Investitiounen an Europa vill méi genee kontrolléiert ginn, fir strategesch Schlësselinteressie virun engem ze vill grouse chineseschen Afloss ze protegéieren?

Mat déiwem Respekt,



Fernand Kartheiser  
Deputéierten